

UN VEGÉTT A CIAPÀ 'L SÙ

Incürvà, in du la man ul bastùn,
silenziùs, lì setà sù 'na banchéta,
ciapà 'l primm sù du la stagiùn
mè 'na lüserta sù 'na müréta.

A l'usèrva ul via vài du la gènt,
düü fiuritt ca giügan cun la tèra,
quàtar püssé grandèi cùran 'mè 'l vènt
cunt in man un legn a fass la guèra.

Cunt ul penséer, quanti ricord al rivéed,
quand... tanti ann fà anca lü l'éra pivèll
a cuur perdifià in di pràa in mèza al vérd
e saltà e fà pirulett 'mè 'n magatell.

Chisà 'sa la pènsa la sò mènt,
j ann sparì du la sò giuventü,
ogni tant ja guarda 'n mumènt,
mò tôca a lùur, lü l'è bùun püü.

Ul sù a l'urizùnt la sbassà i ràgg,
l'aria pian piaan la s'è rinfregià,
l'è ura da rincasà da métass in viagg,
dô urétt gh'inn vugà via.

Cun rassegnaziùun al fissa ul sò bastùn,
la sò man tremulènta la fà présa,
l'ültim sfôrz par truà la pusiziùn,
al s'invia a cà, la spécia la maséra...

Carletto BOSSI